

जसमल ओडण

ओडां रा डेरा रा डेरा गुजरात साम्हा खड़य्या जाय रिया है। माळवा, मेवाड़ मारवाड़ सँ ओडां गुजरात में राव खंगार बुलाया। राव खंगार एक मोटो तळाव खुदावा रो मनसूबो कीधो, अस्यो मोटो तळाव जो राव रा नाम ने अमर करदे।

देस देस रा ओडां ने घणी खातरी रा कागद देर बुलाया। ओड ओडणियां आप आप रा परवार सूधी, कोड सँ भरय्या गुजरात रो गैलो पकड़य्यो। रासबा पै आपणों असबाब लादय्यां, रात पड़य्या तो रुख रे तलै सोय जावै, दिन में वातां करता, रासबा घेरता, तळाव रा सतूना बांधता मारग चालता जाय रिया।

माळवा सँ ओडां रा डेरा गुजरात चाल्या। रासबां रा गळां में मोरपांखां में पोयोडा घूघरा झमझम बाजता जाय रिया। ओडणियां रासबा माथै बैठी गीत गावती गैलो काट री, कीरी कांख में छोरा छोरी रोय रिया, कोई कुदाळी फावड़ा ने सूधा सामती जाय री। राजी राजी हंसती बोलती गुजरात पूगवा ने आगती गैलै चाल री।

“अग्यो मोटो तळाव खुद रियो है के दो बरसां ताई तो गुजरात सँ हालवा रो नाम ही नीं लेणो पड़े।”

“दो बरसां ताई? अतरा दिन माळवा सँ बारै गुजरात में रेणो पड़ेला? ये तो घणां दिन है।” जसमल ओडणी केरी री फांक जसी आख्या में भोळप भरय्यां पूछय्यो।

“थू गैली है, बीनणी। गुजरात कोई अर माळवा कोई? आपारे मजूरी सँ काम, जठै मजूरी मिल जावै जो ही आपणों देस।” रासबा रे टचकारी मारती एक अधकड़ सी ओडण बोली।

जसमल पाळी बोली तो नीं पण जाणै क्यू वीरो काळजो अणजाण्या भै सँ कांपय्यो।

जसमल ही तो तळावा री माटी खोदण वाली ओडणी। बाळपणा सँ कांई पीढय्या सँ माटी खोदण रो काम करता आय रिया। पण बीने देख्यां कुण कै या ओडणी? रूप रा कचन में सीळ री सुगंध ही। हिरणी जसी भोळी आख्यां में सीळ रो सुरमो और ही रूप ने वधाय दीधो। ओडां रा फाटय्याड़ा तंबूड़ा में वा बोलती तो लागतो जाणै वन में कोई वीण रा तार हिलाय गियो।

तड़कता तावड़ा में माटी खोदती, खोदती रे मूंडा पै पसीनो यू लागतो जाणै केवल री पाखड़य्यां पै पड़ी पाणी री वृदां।

तळाव रो काम चाल रियो अर घणां जोर सँ चाल रियो। राव खंगार ने घणी हूस तळाव त्पार करावा री। ओडां रा डेरा रा डेरा रोज नवा नवा आवै। तळाव रे

कने ही आप रा तंबूड़ा तांण दीधा, सारो दिन ओड खोदै, ओडणियां रासबा भर भर होवै, टाबरिया पाळ बांधै, कामैती बैठय्या हाजरी मांडै, राजाजी दिन में दो दाण आव, मन में आगत, कद यो तळाव पूरो है।

जसमल ही दूजा ओड ओडणियां रे लारै तळाव पै माटी खोदै, हेलां न्हाके। चांदी री घूघरियां लागी, ओडणी रा पल्ला सँ मूंडा रो पसीनो पूछती तो घूघरियां रा छणकां लारै देखवा वाळा रा मन रा घूघरा वाज जाता। दोई हाथां में फावड़ो पकड़ माटी खणती तो दूरां सँ लागतो, वायरा सँ चंपा री डाळ झोला खाय री है। रासबा सँ माटी री भरय्योड़ी गुणती उठायनै न्हांकती जद वीरी कमर बेंत री कामड़ी ज्यू लुळ जावती।

ऊनाळा में वैसाख रो मीनो, दिन ढळ रियो, सांझ पड़वा आई। मजूरं छुट्टी कीधी, दिन भर रा थाक्या ओड ओडणियां आपरा रासबा संभाळय्या, टाबर कुदाळ फावड़ा कांधा पै मेल्यां डेरा कानी चाल्या, ओडणियां चूल्हा सलगावा लागी, कोई माथै घड़ा मेल्यां पाणी लावा ने चाली।

सांझ रो वगत, सूरज भगवान अस्ताचळ रो गैलो पकड़य्यो, तपी धरती निसासा छोड़ती ठंडी पड़वा लागी, पंछियां रा जोड़ा चांचां में चुगो भरय्या घुंसाळा साम्हा उड़य्या, घुंसाळां में बच्चा मूडो काढय्या चुगा री वाट देख रिया। आथमणी दिसा री मंगरी डूबता सूरज री किरणां सँ पीळी पीळी व्हेयरी, वीरे नीचै भरी तळाई में सारस रो जोड़ो चांचां सँ पाणो उळीच रियो। लाल मखमल रो जीण कस्योड़ो, अबलक घोड़े सवार राव खंगार हाथ में सोना री मूठ री तरवार लीधां, दिन में तळाव पै हुयोड़ा काम ने देखतो देखतो वठी ने निकळय्यो।

जसमल माथा पै घड़ो मेल्यां पाणी लेवा ने आई, घड़ो पाळ पै मेल धूळा सँ भरय्यो मूंडो धोय री।

राव खंगार री द्रस्टि मूंडो धोवती जसमल पै पड़ी, द्रस्टि ही जठै री जठै अटकगी, हाथ री लगाम ढीली पड़गी, घोड़ा री चाल रुकगी, खंगार तो चित्राम है ज्यू ऊभो रैग्यो, नीं हालणी आयो नीं चालणी आयो। माटी सँ लथपथ व्हीया पगां ने जसमल पाणी में घाल मसळय्या, भाटा पै एड़ी रगड़ी, लाल लाल एड़ी री झाई सँ पाणी गुलाबी गुलाबी व्हेग्यो। राव खंगार रो काळजो हालग्यो।

जसमल आपरे सहज भाव सँ पग धोया, मूंडो धोयो, कुरळा करय्या, घड़ो भरय्यो। राव वीरा रूप ने एकधार आख्यां सँ पी रियो। जसमल अणजाण, भोळी, पवित्तर। राजा सोच रियो यो रूप! यो योवन!! अर यो भोळापणो!!! कठै ही देख्यो नीं, कदे ही सूण्यो नी। सारो रावळो गुललंजा सँ भर राख्या है पण ई रूप री तो छाया ही नजर नी आवै।

दे माटी मू लथपथ व्हीयोड़ी एडिया ही असी लाल है तो राणवास रा दलीचा माई दे पन फिर तो कजाणा काई कै? ई ओइण रा पान खाया बिनां ही होठ अस्या लाल

बूढ़ है तो तबोळ चबायां तो यां होठां रा रंग ने माणक ही कोनी पूसै। तावडा में तपी लगी व्हेवा सू ही ई री लाल पड़ी ओख्यां में अतरो उनमाद है तो

आसा रो पियालो पाया नैणा में ललाई आवैला जद तो कांड राजब व्हेला। मोटी रेजा री ओइणी में ही ईरो अंग यूं लागै जाणै कंवळ रो फूल झोला लेम रियो है तो जद या सोळा सिणगार कर राजसी मसनद पै बैठैला तो अपछरां ही लजा जवैला। यो रतन झुण्डियां में रेवाने थोड़ो ही विधाता सिरज्यो है, रतन तो राब नेला रा सिणगार कै।

पवित्र आत्मा जसमल, माथे घड़ो राख'र चाली, काम सू बिधोड़ो राब खंगार ही वीरे लारै लारै थोड़ो छोड़ दीधो। जसमल रा छोटा छोटा पन धूळा में मड़ता जावै, वीरी ककु वरणी एड़ी ने निरखतो लारै लारै खंगार चाल्यो। थोड़ी सी जसमल चाली, राब खंगार सू रियो नी गियो, आड़ो थोड़ो ऊभो करनै बोल्यो,

राजाजी बुलावै जसमल ओइणी ए,

जसमल! मे'ल जोवण आव।

केसर वरणी कामणी ए,

थां पर रीइयो, राब खंगार।।

जसमल चमकी, राजा? कांपगी केळ रा कंख ज्युं। संभळ'र हाथ जोड़या वीली, काई तो जोवू थारा मे'ल ने ओ,

भूल्या राजा, म्हाने म्हारी सरक्यां रो कोड।

राब खंगार बोल्यो, "म्हारा मे'ल देखवा नीं तो कुंवरं ने देखवा ने तो आ कां ही।"

काई जोवू थारा कुंवरा ने ओ,

भोळा भूपत म्हाने म्हारे ओडां रा कोड।

जसमल यूं जबाब देतां ही आगै चाली। रावजी झट पाछो जसमल रो गैले रोक्सो,

राजाजी बुलावै ओ जसमली ओइणी,

ए जसमल! राणियां जोवण आव।

आळी म्हाने लागै ओइणी ए,

जसमल थां पर रीइयो राब खंगार।।

जसमल ने रीस आई, वी ऊपड़तां ही जबाब दीधो, "परजा ने बिगाडू राजा! थारी राणियां ने म्हुं काई देखू?"

काई जोवू थारी राणियां ने ओ,

भोळा राजा, म्हाने म्हारी ओइणिया रो कोड।

रैत बिगाडू रावजी ओ,

भोळा राजा! भूल्यो भूल्यो राब खंगार।।

राब खंगार फेरुं नीं माथ्यो, वीज ढंग री वात सुरु कीधी, जसमल थोड़ला जोवण धर आव

काजळ रेखी ओइणी ए

जसमल थां पर रीइयो राब खंगार।

जसमल रीस सू राती पड़गी। वीरा पतला पतला होठ धुजवा लाय्य, "रावजी, थारा थोड़ा थारे घरे राखो, म्हारा गधेड़ा सू ही म्हुं राजी हूँ। गुणहीणां राजा, थूं भूल रियो है, म्हने समझी काई है?"

यूं कैती जसमल रावजी रा थोड़ा ने टल्लो देती आगै निकळगी। रावजी जाण्यो थूं या वाता में नीं आवै। ई ने लाळच देणो चावै। लारै लारै थोड़ा पै चाल्या, नैला में वीने केता जावै,

वसवा ने देख्यां हो जसमल धोरियो ए,

जसमल! खिणवा ने देख्या तळाव।

आमै केरी वीजळी ए, जलमल!

थां पर रीइयो राब खंगार।।

जीमवाने देख्या जसमल बंजरी ओ,

जसमल! दूवा ने देख्यां धोळी गाय।

सावण सुरंगी तीजणी ए जसमल,

थां पर रीइयो राब खंगार।।

ओड खोदे ओइणी होवै ए,

जसमल! झूलरिया तो बांझै पाळ।

सदा ओ सुरंगी ए जसमल,

थां पर रीइयो राब खंगार।।

जीं दिन सू राब खंगार जसमल ने देखी वी दिन सू ही घायल मिरा री नई धूसै। मे'ला ने छोड़ दीधा, नवा खुदता तळाव री पाळ पे आप रा ही डेरा तणाप

दीक्षा, कोई काम न काज, ओइ ओइणी खोदै, जठै बैठ्यो रेवै। जसमल रा मोट्यार देवर जेठ खादै, जसमल वीरी देराणी गधा भर भर माटी लायनै गेरै। पसीनो टपकनो जवै, जसमल फावड़ा सू माटी खोदै। राजा देखे अर अचंभो करै, या अतरी मेन करे री है। म्हरा दियोड़ा लालच साम्ही नीं झांक री है। राजा घणी कोसीस कीकी पण जसमल तो राजा साम्ही नीं झाँकी जो नींज झाँकी।

राव खंगार भूलयो वो राजा है, जसमल वीरा आसरा में आयोड़ी परजा है। एक तो यू ही राजमद ऊपर सू काम रो मारयोड़ो। राजा ने चेतो नीं रियो के वो कर कोई रियो है?

धन जोबन अर ठाकरी, तां पर अविवेक।
ये चारु भेला हुवै, अनरथ करै अनेक।।

तलव री पाळ पै बैठ्यो रेणो, जसमल सूं कोई न कोई मिस बात करणी बीने तो।

जसमल माटी री होकरी उठाय जू ही पाळ माथ न्हाकी, खंगार बोल्हो,
थोड़ी थोड़ी होवो जसमल! होकरी ए।
जसमल! पतली कमर बल खाय।।

सुणतां ही जलमल रे लाय लागी। वा पग पटकती पाछी फिरि, रीस री झाल मू हियो मुल्ल गियो, आख्यां में पाणी भरयो पण कैवै कीने? राजा ही यू करण लाग्यो जद। रीस तो बीने असी आई के मार दे कै मर जावै। जसमल मरोड़ो खायनै बी बात तो निकळगी पण जाती कठै? पाछो आपणो तो तलव री पाळ पै ही पड़तो।
माटी खोटा ओडा ने कह्यो, "चालो आपां अठा सू चल्या चालां दूजा देस में जाय मजूरी करा।"

"हो, हो" करने सारा ओइ हंसवा लागया,
"गैलो री बात सुणो। लागी मजूरी छोड़ र दूजी जग चल्या चालां। राजा कतले सूख आपा ने देय राख्यो है।"

जसमल जाणै सुख देवा रो कारण कोई है।
वा इरपती पाळ पै जावै, काम करै, पण वीरी छाती धड़ धड़ करती रवै। राव सील ने गवायनै मेला रा मुख माथै धूळो पड़्यो, आपणी झुपड़ी भली। जसमल ने खंगार घणी घणी भोळई पण वा सत सू नीं डिगी। जसमल पाळ पै रासवा खाली करे नीं, खंगार लेर काकरो मारयो।

राजाजी बैठ है पाळ तलव री,
जसमल! चुग चुग कांकरड़ी सी बाय।
मिरगानैणी मरवण ए जसमल,
थां पर रीझ्यो राव खंगार।।

कांकररी री लागतां ही जसमल रे झाल ऊठी, पाछी फिरतां ही बोली,

मत नां बावो राजाजी कांकररी ओ,
सामी राजा, देखे म्हरा देवर जेठ।
अकल अलूणां राजकी ओ हरामी राजा,
भूल्यो भूल्यो राव खंगार।।

"खे म्हरा घणी हो, घणी व्हे परजा री इज्जत लेवो। थाने लाज नीं आवै।
हरामी राजा! अकल राखो।" जसमल रीस सू कांप री, छाती सास मू ऊची नीची देखे री।

राव खंगार वीं सती री आतमा री आवाज नीं समझ्यो, वो तो बी रूप पै और हो रीझ्यो। वीरा सील ने नीं कूत सक्यो। वो सझ्मयो या देवर जेठा मू इरपै। हंसते लगे पूछ्यो,

किसई उणियारै थारो घर धणी ए,
जसमल! किसई उणियारे देवर जेठ।
तनक मिजाजण मोवर्णा ओ जसमल,
थां पर रीझ्यो राव खंगार।

जसमल आगळी उठाय माटी खणता सांवळा रंग रा मोट्यार ने, लाल दुमालो बांधा देवर जेठां ने बताया।

राजा बारे साम्ही झांक मुलकयो। जसमल आड़ी ने पांवडो भरतो बोल्हो, "बस या सू ही थू इर री ही?"

कैवै तो मरा दू थारो घर धणी ए,
जसमल! कैवै तो मरा दू देवर जेठ।
ऊजळदंती ओइणी ए जसमल,
थां पर रीझ्यो राव खंगार।।

राव खंगार हाथ पकड़वा लाग्यो, जसमल बीजळी री नाई तड़पसी।

"खबरदार, जो म्हरा हाथ लगायो। पापी! हट जा अठा मू।"

खंगार आपा में नीं रियो। ई ओइणी री या हिमात! एक मजूरी अर म्हने गाल दे। ईरी ओकात कोई?

"मान जा जसमल, अबै ही मान जा, ज्युं थारो मन राख रियो हूं ज्युं थूं माथे चढ़ती जाय सी है। महुं जबरदस्ती थाने रावला में ले जायनै बैठाय दूं ला, थूं कर काई नै बैला?"

कैवतो कैवतो खंगार, जसमल रो हाथ पकड़ियो। जसमल तो एक हाथ सूं दीधे राव खंगार ने धक्को। भूखी सिधणी सी नाई विकराळ क्हीया हाथ में फावड़े ले राजा रे सामही तण'र ऊभी क्हेगी।

"माथो फोड़नै मार अर मर जावूला, जो एक पांवडो आगै दीधो।" सती रो तेज सूरज रा तेज सूं ही घणों क्हे।

"अबै ही समझ जा जसमल! अब ही समझ जा, हाल मोड़ो'नी क्हीयो।" कैवतो कैवतो राव खंगार पाछो फिरियो।

दिन उगता ही राव खंगार जसमल रा तंबूड़ा साम्हें झांक्यो। वठै तो सून पड़ी, माळवा सूं आयोडा ओडा रो एक ही डेरो नीं। डेरा में चूल्हां री राख पड़ी। गधेड़ां री लीद रा दुगला रैय्या, ओड जायो एक नीं। डेरा पे काराला पड़ रिया अर कुत्ता भुन रिया।

ओडण लदी समी सांझ री ओ,
कामी राजा! ओड लदिया ढळती रात।

जसमल रे साथै राजा रो यो बरताव देख ओड सारा ही उचाळो घाल आधी रात रा लदय्या। जसमल कोसा पार क्ही। यो हाल देख्यो तो राव खंगार घणों पछलायो। घणों दुखी क्हीयो।

इमड़ी जाणूं तो जसमल ओडणी ए,
जसमल! डेरा थारा देतो लुटाय।

"राजब क्हेगी। असी जाणतो तो यां ओड़ी रा डेरा लुटाय देतो, यांने मराय देतो, जसमल नै खोल लेतो। जसमल हाथा बारै परी गी।"

"महुं गुजरात रो पराकरमी राजा, महुने एक ओडणी ठोकर मार ओड रे लारै चलती क्ही।" जसमल, जसमल" करतो राव उठय्यो,

घोडा दोहाया राव खंगार ओडा रे पाछे रा पाछे।

"मार दो ओडा ने मुकाबलो करै तो। पकड़ लावो जसमल ने। राजी करी, जबरदस्ती करो, पण जसमल आवणी चावै।"

खंगार रा घुड़ सवार दोहय्या। ओड पाछे फिर फिर नै देखता जावै, चाल्या जावै। पाछे देखै तो घोड़ा री खेह उड़ती दीखी।

"मारय्या, खंगार री फोज आयगी। आपा ने मारैला, जसमल ने ले जावैला।" जसमल कापगी, खंगार महुने बंधाय ले जावैला। सीळ बिना जीवणों करयो? ई तो मर जावणो ही भलो। जसमल ओडां रे हाथ जोड़य्या "महारी बेइज्जती मत राओ, चिता चुण दो, महुं जीवती बल जावूं पण कीं राजा रे रावला में नीं जावूं।" रे मोटय्यार रोवतै रोवतै लकड़य्यां भेली कर दीधी।

जसमल अगनी में बैठगी।

राव खंगार आयो, देखे तो जसमल जळ री "जसमल, जसमल! पकड़ो, चिता सूं काढ़ो, काढ़ो।"

चिता में सूं जसमल बोली, "जसमल री राख चावै तो लेजा।" चिता री झाळा जसमल छिपगी। खंगार देखतो रैयो।

जसमल, सतियां री सिरताज, जसमल सीळ री मोल चुकायगी।